

拔濟苦難陀羅尼經

一名勝福往
生淨土經

唐三藏法師玄奘奉

詔譯

如是我聞一時薄伽梵在室羅筏住誓多林
給孤獨園與無央數聲聞菩薩摩訶薩俱及
諸天人阿素洛等無量大衆前後圍繞爾時

衆中有一菩薩名不可說功德莊嚴從座而
起頂禮佛足合掌恭敬白佛言世尊今此世
界無量有情煩惱因緣造諸惡業當墮地獄
餓鬼傍生或天人中受諸劇苦唯願哀愍方
便拔濟佛言善男子善哉善哉汝能哀愍一

行四

九

切有情作如是請諦聽諦聽吾今爲汝略說
拔濟衆苦方便善男子有佛世尊名爲不動
如來應正等覺爲欲利樂諸有情故說陀羅
尼令衆誦念陀羅尼曰

羯羯尼羯羯尼 魯折尼魯折尼 咄盧磔

尼 咄盧磔尼 恒邏薩尼 恒羅薩尼

般刺底喝那 般刺底喝那 薩縛羯莫般

藍般邏尼謎 莎訶

若有善男子善女人至誠敬禮不動如來應
正等覺受持此呪先所造作五無間業四重

十惡毀諸聖賢謗正法罪皆悉除滅臨命終

時彼不動佛與諸菩薩來現其前稱讚慰喻

令其歡喜復告之言今來迎汝應隨我往所

從佛國彼命終已決定往生不動如來清淨

佛土善男子復有世尊名滅惡趣王一名大

自在勝經如來應正等覺爲欲利樂諸有情

故說陀羅尼今衆誦念陀羅尼曰

輸達泥輸達泥 薩縛播波毗輸達泥 戌

睇毗戌睇 薩縛羯莫毗戌睇 莎訶

若有善男子善女人至誠禮敬滅惡趣王如

來應正等覺受持此呪萬四千劫常憶宿命
所在生處得丈夫身具足諸根深信因果善
諸技術妙解諸論好行惠施厭捨諸欲不造
惡業離諸危怖具正念慧衆所愛重常近善
友恒聞正法求菩提心曾無暫捨以諸功德
而自莊嚴具善律儀怖諸惡業恒無匱乏調
柔樂靜於天人中常受快樂速證無上正等
菩提終不退於十到彼岸常願利樂一切有
情諸所修行非專自利在所生處常得見佛
護持正法預賢聖衆時薄伽梵說此經已聲
聞菩薩及諸天人阿素洛等聞佛所說皆大
歡喜信受奉行

行四

十

拔濟苦難陀羅尼經